

Տիգրան Մ. Պետրոսյանց

tigranhayazn@mail.ru

orcid: 0000-0001-6946-1137

Հրաչյա Տ. Պետրոսյանց

petrosyants.hrachya@gmail.com

orcid: 0009-0001-9033-0403

ԿՈՂՄՆԱԿԱԼՈՒԹՅՈՒՆԸ ԶԱՔԱՐՅԱՆ ՀԱՅԱՍՏԱՆՈՒՄ*

Ամփոփում

XII դարի վերջին տասնամյակում և XIII դարի առաջին տասնամյակում Հայաստանի փաստացի անկախությունը վերականգնած շահնշահ Զաքարե Երկրորդ Զաքարյանը իր հիմնած Հայաստան-Հայքի թագավորությունում իրականացրել է վարչատարածքային բարեփոխումներ և երկրի ներսում ստեղծված առանձին վարչական միավորներին տվել **կողմնակալություն**, դրանց ղեկավարներին՝ **կողմնակալ**անունները՝ նրանց շնորհելով **իշխանաց իշխանի** աստիճան-կոչում: Այս վարչատարածքային միավորները, լինելով XIII դարի պատմաքաղաքական իրավիճակի արգասիք, ամբողջովին արտացոլում էին երկրի ղեկավարի պետություն կերտելու մոտեցումները: Թեև այդ ժամանակի հայկական իրականության մեջ դրանք նոր երևույթ էին, այնուամենայնիվ ունեին իրենց պատմական նախադեպերը:

Բանալի բառեր – Զաքարյաններ, շահնշահ Զաքարե Բ Զաքարյան, Իվանե Ա Զաքարյան, բդեշխ, կուսակալ, պետականության վերականգնում, կողմնակալություն, կողմնակալ, Վահրամյաններ, Թմոզվեցիներ, Վաչուտյաններ, Դոփյաններ, Խաղբակյան-Պողոսյաններ, Օրբելյաններ, Հասան Զալալ Դոլո:

* Հոդվածն ընդունվել է տպագրության 23. 02.2025:

Tigran M. Petrosyants
Hrachya T. Petrosyants

**THE GOVERNORSHIP (KOGHMNAKALUTYUN)
DURING THE ZAKARIAN ERA IN ARMENIA**

Abstract

In the last decade of the 12th century, in the first decade of the 13th century, Shahنشah Zakare II Zakaryan, who restored Armenia's independence, carried out administrative territorial reforms in the Armenia-Hayk kingdom he founded and gave bias to individual administrative units created within the country, biased names to their leaders, awarding the latter with the title of prince of princes. These territorial units, being the product of the historical and political situation of the 13th century, completely reflected the philosophical approaches of the country's leader to building a state. Although they were a new phenomenon in the Armenian reality of that time, they still had their historical precedents.

Key words - Zakaryans, Shahنشah Zakare B Zakaryan, Ivane A. Zakaryan, bdeshkh, viceroy, restoration of statehood, Vahramyans, Tmogvets, Vachutyans, Dopyans, Khalbakyan-Proshians, Orbelyans, Hasan Jalal Dolo.

Тигран М. Петросянц
Рачья Т. Петросянц

**АДМИНИСТРАТИВНАЯ ЕДИНИЦА КОХМНАКАЛУТЮН
В ЗАХАРИДСКОЙ АРМЕНИИ**

Резюме

В последнем десятилетии XII века, в первом десятилетии XIII века, шахنشah Закаре II Закарян, восстановивший независимость Армении, осуществил административно-территориальные реформы в основанном им Армения-Айкском царстве и придавал отдельным административным единицам, созданным внутри страны, и давал предвзятые имена их главам, даровав последнему титул княжеского князя. Эти территориальные единицы, являясь продуктом историко-политической ситуации XIII века, полностью отражали философские подходы лидера страны к государственному строительству. Хотя они были

новым явлением в армянской действительности того времени, они все же имели свои исторические прецеденты.

Ключевые слова: Закаряны, Шахншах Закаре Б Закарян, Иван А Закарян, бдеш, правитель пограничной области, восстановление государственности, Ваграмяны, Тмогвецы, Вачутяны, Допьяны, Хахбакян-Прошьяны, Орбеяны, Хасан Джалал Доло.

Մուտք

XII դարի վերջին տասնամյակում և XIII դարի առաջին տասնամյակում Հայաստանի փաստացի անկախությունը վերականգնած շահնշահ Զաքարե Երկրորդ Զաքարյանը Հայաստան-Հայքի թագավորությունում իրականացրել է վարչատարածքային բարեփոխումներ և երկրի ներսում ստեղծված առանձին վարչական միավորներին տվել **կողմնակալություն**, դրանց ղեկավարներին՝ **կողմնակալ** անուններ՝ նրանց շնորհելով **իշխանաց իշխանի** աստիճան-կոչում: Այս վարչատարածքային միավորները, լինելով XIII դարի պատմաքաղաքական իրավիճակի արդյունք, ամբողջովին արտացոլում էին երկրի ղեկավարի՝ պետություն կերտելու մոտեցումները: Թեև այդ ժամանակի հայկական իրականության մեջ դրանք նոր երևույթներ էին, այնուամենայնիվ ունեին իրենց պատմական նախադեպերը: Պատմահայր Մովսես Խորենացին հայտնել է, որ Արամ Աշխարհակալը երկիրը բաժանել է աշխարհագրական չորս կողմերի և այդ կողմերը հսկողներին անվանել **բդեշխներ**: Հայ պատմագրությունն այս բդեշխներին դիտարկում էր որպես ծայրագավառ-կողմերի պաշտոնատար կառավարիչներ, որոնք առաջինն էին ընդունելու և հակահարված տալու երկիր արշավող թշնամիներին: Բդեշխները համարվել են նաև **փոխարքաներ**: Վաղարշակ թագավորի հետ կապված ժամանակահատվածի համար Մովսես Խորենացին շրջանառության մեջ է դրել նաև **կողմնակալություն**, **կողմնակալ**, **կուսակալ** եզրույթները: Երկրակողմ պահող այս **բդեշխություն-կուսակալություն-կողմնակալություն/ները՝ փոխարքայությունների** կարգավիճակով, լիարժեքորեն գործել են Երվանդյանների, Արտաշեսյանների, Արշակունիների թագավորությունների ժամանակներում: Այս կառավարչական միավորները կառավարման համակարգում արդյոք միայն վարչական իրավասություններ ունեի՞ն, թե՞ նաև ռազմական գործառույթներ են իրականացրել: Այն փաստը, որ

դրանք պարտավոր էին առաջինը դիմակայելու հակառակորդ-թշնամուն, դրանց ռազմունակության գործառույթի ապացույցն է:

Բագրատունիների կողմից 885 թվականին վերականգնած անկախ պետությունը կորցրել էր իր աշխարհագրական տարածքի կեսից ավելին, պարփակվել էր Այրարատ նահանգի կենտրոնական մի քանի գավառների, Գուգարքի, Տավուշի մեկ-երկու գավառամասերում և այլևս այնպիսի սփռվածություն չուներ, որ բդեշխության-կողմնակալության ինստիտուտները վերականգնվեին: Բագրատունիների թագավորությունը մեկ ընդհանուր ամբողջություն էր:

Այլ կերպ վարվեց Զաքարե Բ Զաքարյանը: Իր վերականգնված Հայաստան-Հայքը նա վարչականորեն բաժանեց կողմնակալությունների:

1. Հայեցակարգային մոտեցումներ

XII դարի առաջին կեսին Հայաստանի Հյուսիսային տարածքները գրաված վրաց թագավորները իրենց համարել են Հայոց Բագրատունի թագավորների ժառանգորդ, սեփականել Բագրատունյաց Հայաստանի տարածքը, Բագրատունիների «շահնշահ» տիտղոսը, իսկ 1170-1177 թվականներին իրենց հռչակել «Հայոց արքա» (Какабадзе, 1926, 124): Մինչ 1185 թվականը Վրաստանի ռազմակալած Հայաստանի տարածքների հայ իշխանավորներն ու զորականները ծառայել են վրացական արքունիքին, մասնակցել պատերազմական գործողություններին, որոնք հիմնականում մղվել են Վրաստանին սահմանակից հայկական պատմական տարածքներում, բայց անմասն են մնացել պետական ինքնուրույնությունից: Սակայն օգտվելով 1185 թվականին Թամար թագուհու հրամանագրով Հայաստանին շնորհված ինքնուրույնության իրավունքից՝ 1185-1200 թվականներին՝ մեկուկես տասնամյակի ընթացքում, շահնշահ Զաքարե Բ-ն և եղբայրը՝ Իվանե Ա-ն, «բազում մարտս քաջութեան ցուցին, քանզի զբազում աշխարհս հայոց, զոր ունէին պարսիկք և տաճկունք, առին ի նոցանէ յինքեանս՝ զգաւառս, որ շուրջ զծովովն Գեղարքունոյ, և զՏաշիր, և զԱյրարատ, զԲջնի քաղաք և զԴուին, և զԱնբերդ, և զԱնի քաղաք և զԿարս, և զՎայոյ ձոր, և զաշխարհն Սիւնեաց և որ շուրջ զնովաւ են բերդք, քաղաքք, և գաւառք. հարկատուս արարի և զսուլտանն Կարնոյ քաղաքին. աւերեցին զբազում գաւառս Պարսից և զԱտրպատականու, ընդարձակեցին զսահմանս իւրեանց յամենայն կողմանց» (Գանձակեցի, 1961, 163): Սելջուկ-թուրքերից ազատագրվել են Բագրատունիների ժամանակների Անի-Շիրակի, Կարսի, Ձորագետի, Սյունյաց թագավորությունների տի-

րույթները, Դվին քաղաքն իր շրջակա գավառներով: Ազատագրված հողերում Զաքարյանները դարձել են Հայաստանի ինքնիշխան տիրակալներ և իրենց հայտարարել Բագրատունի թագավորների իրավահաջորդներ: Ժամանակակիցները Զաքարյանների պետությունը կոչել են «պետություն», «աշխարհակալ պետություն», «պետական իշխանություն», «աշխարհակալություն», իսկ իրենց՝ Զաքարյաններին՝ «թագավոր», «շահնշահ», «կեսար» (Հայ ժողովրդի պատմություն, 1976, 541-544; Հայկական սովետական հանրագիտարան, 1977, 676-677; Մանանդյան Հ., 1977, 154), բոլոր տիտղոսներով, որ կրել են Բագրատունիները: Բայց իրենց հայտարարելով Բագրատունի թագավորական ընտանիքի ժառանգ, իրավահաջորդ և հինավուրց պետականության վերականգնողները՝ Զաքարյանները, իրավաբանորեն կրկնակի թագավորություն հռչակելու խնդիր չեն իրականացրել, բավարարվելով նրանով, որ ինչպես փորագրել են Հաղարծինի վանական համալիրի գավթի մուտքին, տիրել են «...սեփական ժառանգութեանն նախնեաց մերոց» (Դիվան հայ վիմագրության, 1977, 22) (Բարխուտարեանց, 1999, 346):

Սրանով է բացատրվում Զաքարե Բ-ի չթագադրվելը: Օգտագործելով այս փաստը՝ 1185-1236-ական թվականների Զաքարյան անկախ Հայաստան-Հայքը վրաց հեղինակները դիտել են Վրացական թագավորության մաս: Հայ պատմաբանները իրականությունն իր անունով կոչելու փոխարեն Զաքարե Բ-ի ստեղծած պետությունը կոչվել են պետությունից մեկ աստիճանով ցածր միավորում՝ իշխանապետություն՝ ավատական իշխանությունների միավորում²:

Արձանագրենք, որ Զաքարյանների վասալ լինելու, Հայաստանը Վրաստանի մաս կազմելու մասին դատողները պիտի իմանան, որ այլ երկրի մաս է միայն այն տարածքը, որը վարչական արտաքին սահմաններ, ներքին հստակ բաժանում, սեփական իշխանական իշխանակարգ (հիերարխիա), հորիզոնական և ուղղահայաց ենթակառուցվածքներ չունի և հարկատու է այլ պետության:

Իսկ Զաքարյան Հայաստանն ուներ.

ա) գերիշխանություն (суверенитет) (Բլբուլյան, 2011, 884) իր տարածքի նկատմամբ.

բ) պետական խորհուրդ՝ կառավարման բարձրագույն մարմին և արքունիք (Բաբայան Լ. Հ., 1964, 66-69).

² Զաքարե Ա շահնշահի ստեղծած բացարձակ անկախ պետության մասին գրել ենք մեր «ԶԱՔԱՐԵ. Հայոց շահնշահ, թագավոր, արքա, կեսար, ինքնակալ, տիեզերակալ» պատմաքաղաքական վեպում (2023):

գ) ստույգ արտաքին սահման Վրաստանի հետ, որ անցնում էր Գագ-Չորակերտ-Ջավախք-Արդահան-Փանասկերտ գծով (Թորոսյան, 1992, 325-326)։

դ) ներքին վարչական հստակ բաժանում։

ե) իր տարածքում միատար բնակչություն։

զ) երկրում առկա հորիզոնական կառավարման համակարգ (գյուղ, քաղաք, գավառ, կողմնակալություն-փոխարքայություն, թագավորություն)։

է) ուղղահայաց աստիճանակարգ (գյուղապետ, քաղաքապետ, կողմնակալ-փոխարքա՝ իշխանաց իշխան, իշխանական հրամանակատար, գորահրամանատար-սպարապետ, ինքնակալ թագավոր)։

ը) 1185 թվականից սկսած Զաքարյան Հայաստանը հարկատու չէր երկրորդ երկրի (Ակներցի, 1954, 179; Ակներցի, 1974, 80), անգամ արշավանքներից ստացված ամբողջ ավարը տարվել է Լոռի, ավելի ուշ՝ Անի և Վրաստան մասհանում չի կատարվել, իսկ Թամար թագուհուն այցելելիս, Զաքարյան եղբայրները նրան միայն նվերներ են տարել, մինչդեռ տիրոջը, պուգերենին օրենքով էր ավարամաս հասնում (Շահնագարյան, 1990, 320-321)։

թ) 1185 թվականից հետո ձեռք բերած ռազմական ավարի որևէ պարտադիր մաս չի տրվել Վրաստանի թագավորական գանձարանին։ Այդպիսի հատկացում կատարվել է միայն Վրաստանի տարածքում մղված պատերազմական գործողությունների ժամանակ մեկ հինգերորդի չափով՝ պատերազմներին վրացական զորամիավորման մասնակցության համար (Շահնագարյան, 1990, 152)։ Ներհայաստանյան տարածքներում մղված պատերազմներին վրաց զորամիավորումներ չեն մասնակցել և մասհանում չէր կարող կատարվել։

Հայաստանը ինքնուրույն հորիզոնական դիվանագիտական ճանաչում էր ստացել առաջին հերթին Վրաստանի արքունիքի կողմից 1185 թվականի անկախացման «սամթավրով»։ Այդ նույն թվականին Հայաստան-Վրաստան դաշնակցային պետության ստեղծումով, Կիլիկիայի Հայկական թագավոր Լևոն Բ թագավորի Զաքարե Բ-ին ուղղված նամակով (Գանձակեցի, 1961, 168), Խլարի Էմիր Ավադ Նեմջեղինի հետ կնքած պայմանագրով, 1223 թվականին Հռոմի պապ Հոնորիոս Գ-ի Երուսաղեմն ազատագրելու կոչին ի պատասխան, նրան ուղղված Իվանե Ա-ի նամակով, որտեղ Իվանե Ա-ն նշել է, որ պատրաստել է 40 հազարանոց զորք, բայց մոնղոլական հարձակման պատճառով չի կարողացել մասնակցել խաչակրաց արշավանքին (Ակներցի, 1974, 21-22) և Հռոմի պապի Իվանե

Ա-ին 1224 թվականի մայիսի 12-ի պատասխան նամակով (Թորոպյան, 1992, 302):

Հետազոտության վարկածը հետևյալն է.

ա) Զաքարյանները XII դարի 80-ական թվականներին վերականգնել են 1045 թվականին կործանված Հայոց պետականությունը:

բ) Զաքարյանները 1185 թվականին քաղաքական-պետական ասոցացված միասնական պետություն են կազմել Վրաստանի հետ՝ պահպանելով սեփական բացարձակ անկախությունը:

գ) Զաքարյանները Հայաստանի տարածքային կառավարման համակարգի հիմքում դրել են նոր ստեղծված **կողմնակալության-փոխարքայության** գաղափարը, որով գրեթե կրկնել են հազարամյակներ առաջ հայկական կառավարման համակարգում եղած կողմնակալություն-բդեշխություն-փոխարքայությունների գործառույթները:

դ) Կողմնակալություն-փոխարքայությունների, կողմնակալ-կառավարիչների հասարակական, սոցիալ-տնտեսական, կրթամշակութային գործունեության պատմությունը ներկայացվում է կողմնակալության պատմական վերակենդանացման, դրա լեզվական բաղադրիչի, վարչական տարածքի ընդգրկման, կողմնակալ-փոխարքայի պաշտոնի և աստիճանի, կողմնակալության ռազմունակության տեսանկյուններից:

ե) 1185-1236 թվականների Հայոց անկախ պետականության և 1236-1350-ական թվականների մոնղոլական տիրապետության շրջանի հայկական կառավարման ժամանակաշրջանի առանձնահատկությունները:

2. «Կողմնակալություն», «կողմնակալ» եզրույթների լեզվաբանական հենքը

Հայ լեզվամտածողության մեջ առկա **կողմ/ն-ա-կալ/ություն** բառը բարդ, ածանցավոր գոյական է կազմված **կողմ** արմատից, **ա** հոդակապից, **կալ** արմատից, **ություն** վերջածանցից:

Հայ բառարանագիր-լեզվաբաններն այսպես են ներկայացրել **կողմ/ն-ա-կալ/ություն**, **կողմնակալ** եզրույթները:

1836 թականին Վենետիկում տպագրված «Նոր բառգիրք Հայկազեան լեզուի» գրքում հեղինակները գրել են՝ ԿՈՂՄՆԱԿԱԼ. Ունօղ արքունի իշխանութեամբ կամ զաւառս տէրութեան. Կուսակալ, բդեշխ, պէյ, փաշա, միասելլիմ: ԿՈՂՄՆԱԿԱԼՈՒԹԻՒՆ. Իշխանութիւնի, կողմնակալի, կուսակալութիւնի (Նոր բառգիրք Հայկազեան լեզուի», 1836, 1112):

Ակադեմիկոս **Ստեփան Մալխասյանցն** իր կազմած «Հայերեն բացատրական բառարան»-ում գրել է՝ ԿՈՂՄՆԱԿԱԼ, 1. Երկրի մի կողմի կամ նահանգի պետ՝ կառավարիչ, կուսակալ: ԿՈՂՄՆԱԿԱԼՈՒԹԻՒՆ. 1. Կողմնակալ լինելը, կողմնակալի պաշտօնը, կուսակալություն (Հայերեն բացատրական բառարան, 1944, 1112):

Ակադեմիկոս **Հրաչյա Աձառյանը** գրել է, որ **կողմ** (–ման, –մանք, –մանց) բառն առաջացել է «կողմ, գաւառ, երկիր, կող, կողքին եզերքը» ձևից: Կողմն, միջին շրջանի ձևն է, որից...**կողմնակալ** ... (Աձառյան, 1973):

Ակադեմիկոս **Էդվարդ Աղայանը** «Արդի հայերենի բացատրական բառարան» գրքում գրել է՝ ԿՈՂՄՆԱԿԱԼ, 2. (պատմ.): Հին Հայաստանում՝ ծայրագավառների կուսակալ: 3. ԿՈՍՍԱԿԱԼ (պատմ.): 1. Նահանգի կառավարիչ, նահանգապետ (Արևմտյան Հայաստանում): 2. Իշխանության բարձրագույն ներկայացուցիչն ու կառավարիչը ծայրագավառում, **փոխարքա**³ (ցարական տիրապետության շրջանում): 3. Ծայրագավառների կառավարիչ հին Հայաստանում (Աղայան, 1976, 750–784):

Աշոտ Սուքիասյանը «Հայոց լեզվի հոմանիշների բառարան»-ում գրել է՝ ԿՈՂՄՆԱԿԱԼ, 2. (պատմ.) Կուսակալ, կողմնապահ, կողմնապետ (Հին Հայաստանում ծայրագավառների պետ, իշխան): 3. Տե՛ս **Բդեշխ**: 4. Տե՛ս **Կողմնակից**: ԿՈՂՄՆԱԿԱԼՈՒԹՅՈՒՆ... 2 (պատմ.) Կուսակալություն, **կողմնապետություն**: 3 Տե՛ս **Բդեշխություն**: ԲԴԵՇԽ, տե՛ս Կուսակալ, Հյուպատոս (Սուքիասյան, 2003):

«Ժամանակակից Հայոց լեզվի բացատրական բառարան»-ի հեղինակները արձանագրել են՝ ԿՈՂՄՆԱԿԱԼ. 2. Հին Հայաստանում՝ ծայրագավառների կուսակալ: ԿՈՂՄՆԱԿԱԼՈՒԹՅՈՒՆ. 2. (հնացած) կուսակալություն, կողմնապահություն, կողմնապետություն (Ժամանակակից հայոց լեզվի բացատրական բառարան, 1974, 169–170):

Վերը ներկայացված օրինակներից հետևում է, որ բառարանագիրները շրջանառել են **բդեշխ, կուսակալ, կառավարիչ, կողմնակալ, կողմնակալություն** եզրույթները, որոնք ներկայացրել է պատմահայր Մովսես Խորենացին՝ Վաղարշակ թագավորի կատարած նշանակումների առիթով: Սակայն բառարանագիրները մեկնաբանելով բառային եզրույթները դրանք իրարից չեն զատել և ամեն ինչ միանշանակ է ներկայացված՝ իրարից չտարբերելով վարչական միավորը և դրանց պաշտոնյա ղեկավարները:

³ Ընդգծումը մերն է:

Օրինակ **բդեշխ**-ի⁴ համար շրջանառված օրինակներ. «...և **բդեշխն** անուանեալ Աղձնեաց...» (Մովսէսի Խորենացոյ, 1881, 73): **Բդեշխ և կողմնակալ**: «Իսկ ընդդէմ լերինն Կաւկասայ **կողմնակալ** հիւսիսոյ կարգէ զմեծ և զհզօր ազգն, և նահապետութեանն անուն կարդայ **բդեշխ** Գուգարացոց...» (Մովսէսի Խորենացոյ, 1881, 113): **Բդեշխ և կուսակալ**: «Եւ զՇարաշան ի տանէ Սանասարայ հաստատէ **բդեշխ մեծ և կուսակալ** յարևմտից հարաւոյ, յեզեր սահմանացն ասորեստանի, առափն Տիգրիս գետոյ...» (Մովսէսի Խորենացոյ, 1881, 116): «...հաստատէ **կուսակալ** արևմտից. և յերեսացն անպիտանութենէ կոչէ զանուն ազգին Անգեղ տուն» (Մովսէսի Խորենացոյ, 1881, 114): **Կողմնակալության** եզրույթի օգտագործման օրինակներ՝ «...և համայն ասել օրէն թագաւորութեան, և որ ինչ շուրջ թագաւորութեամբն. Զօրաց, զօրապետաց, **կողմանց կողմնակալաց**, և որ նման այսոցիկ» (Մովսէսի Խորենացոյ, 1881, 109): «Յետ սորա (Վաղարշակի-Տ.Պ.) մեծ և անուանի և բազմաբեր զարևելից հիւսիսոյ կողմանն կարգէ **կողմնակալութիւն**՝ զայր անուանի և յամենայն գործ մտաւորութեան և հանձարոյ առաջին, զԱռան, առ մեծ գետովն, որ հասանէ զդաշտն մեծ, որ անուանի Կուր» (Մովսէսի Խորենացոյ, 1881, 112):

Բերված օրինակներից չի երևում բդեշխ, կուսակալ, կողմնակալ պաշտոնյաները լոկ քաղաքացիական կառավարիչներ էին, թե նաև ռազմական բաղադրիչ կրողներ: Այս հարցի պատասխանը տալիս է Արշակունիների օրոք ստեղծված **Զորանամակը**:

3. Հայոց Զորանամակը վարչական միավորների ռազմունակության հենք

Վերը թվարկված օրինակներով փաստեցինք, որ Հայոց իշխանակարգում հնագույն ժամանակներից գործել է ստույգ գահակարգ, որի համաձայն՝ յուրաքանչյուր վարչական միավորի կառավարիչ ունեցել է գահ: Գահակալ իշխանավորներն արդյոք եղել են միայն քաղաքացիական կառավարիչներ, թե՞ օժտված են եղել նաև ռազմական բաղադրիչով:

⁴ Մասնագիտական գրականության համաձայն ծագել է պահլավական bitaxs ձևից և բառացի նշանակել է փոխադր, կուսակալ, սահմաապահ, կողմնակալ: Արտաշեսյանների օրոք Մեծ Հայքի սահմանապահ չորս բդեշխներն էին **Անգեղտան, Ծոփաց, Աղձնեաց, Գուգարաց** կառավարիչները: Նրանց յուրաքանչյուրին ենթակա էին հարևան նախարարությունները (Ղազար Փարպեցի, 1982, 496):

Նրանք եղել են ոչ միայն քաղաքացիական կառավարիչներ, այլ նաև ռազմական պատասխանատուներ: Հայոց թագավորները երկրի պաշտպանունակությունը ամրապնդելու նպատակով երկրի տարածքը բաժանել էին աշխարհագրական չորս կողմերի՝ դրանցում ընդգրկելով իշխանական տների ռազմական կարողությունները:

Ասվածի հիմքը մեզ հասած Զորանամակն է (Յովհաննէս եպս. Շահխաթունեանց, 1842, 244–245):

Զորանամակով սահմանված ռազմական բաղադրիչ-իշխանակարգը ստույգ գործել է Արշակունիների թագավորության ժամանակահատվածում՝ մ.թ.ա. II դարից մինչև մ.թ. V դարը⁵:

Զորանամակի մեզ հասած օրինակում արտացոլված է իշխանական տների զորաունակությունը: Պատերազմական իրավիճակներում յուրաքանչյուր իշխանական տիրույթը հրամանատար-իշխանի գլխավորությամբ որոշակի քանակի հեծյալ զինվոր է հանել մարտադաշտ:

Զորանամակի գոյությունը հենց առհավատյան է, որ Հայաստանի վարչական միավորները (բղեշխության, կուսակալության, կողմնակալության ղեկավարներ) ոչ միայն օժտված էին քաղաքացիական իշխանությամբ, այլ նաև ունեին ռազմական բաղադրիչի պարտադիր իրավասություն:

4. Կողմնակալություն-փոխարքայությունների հիմնումը Զաքարյան Հայաստանում

1185 թվականին Զաքարյանները վերականգնել են Հայաստան—Հայքի պետականությունը: Որոշակի փուլում իր աշխարհագրական ընդգրկումով երկու անգամ այն գերազանցել է Բագրատունյաց Հայաստանի տարածքը, ինչպես նաև ենթակա-հարկատու է դարձրել թե՛ արևելյան, թե՛ արևմտյան կողմերում գտնվող մուսուլմանական պետություններին:

Լոռու տարածքում անկախություն ստացած Սարգիս Մեծն իր թագավորության անկախությունն ու անվտանգությունն ապահովելու նպատակով Վիրքի արքա Թամար թագուհու հետ վերպետական միավորում է ստեղծել, որի արդյունքում Հայաստանը և Վիրքը, մնալով անկախ պետական միավորներ, կազմել են միասնական կառավարման համակարգ՝

⁵ Կարծում ենք, որ Արշակունիները Հայաստանում գահակալական իրավունք են ստացել Վաղարշակ թագավորով մ.թ.ա. երկրորդ դարից:

կառավարող մարմնով, որի կազմում Սարգիս Մեծը եղել է հայ-վրացական զորքերի գլխավոր հրամանատարը:

Սարգիս Մեծին 1187 թվականին հաջորդած շահնշահ Ջաքարե Բ Ջաքարյանը շարունակել է հոր գործը: Նրա օրոք վերապետական կառավարությունում Սարգիս Մեծի փոխարեն ընդգրկվել են ինքը՝ Ջաքարե Բ-ն, Իվանե Ա-ն, Վահրամ Գագեցին: Սա նշանակում է, որ կառավարման այդ մարմնի հինգ անդամներից երեքը ներկայացրել են Ջաքարյանները:

Ջաքարե Բ Ջաքարյանը հոր մահից հետո ամբողջովին նվիրվել է Հայաստան-Հայքի կայացման ներքին խնդիրների լուծմանը և անկախ պետության իրական կայացմանը: Նա, վերահաստատելով իր տոհմական շահնշահ տիտղոսը, երկրի կառավարելիությունը դյուրացնելու նպատակով, վերականգնել է կառավարման ուղղահայաց կարգը՝ Հայքի տարածքը բաժանել ուղղակիորեն շահնշահին ենթակա **կողմնակալությունների**: Դրանք կառավարելու համար նշանակել է **կողմնակալներ**⁶՝ շնորհելով վերջիններիս երկրի շահնշահ-միապետ-թագավորի աստիճանից հետո երկրորդ՝ **իշխանաց իշխան** կոչումը (Գարեգին արքեպիսկոպոս Հովսեփյան, 1928, 16; Բաբայան Լ.Հ., 1964, 64; Գրիգորյան Գ.Մ., 1981, 53; Շահնազարյան Ա.Ի., 1990, 134; Պետրոսյանց Տ., 2023, 558):

Կողմնակալը պետական պաշտոնյա էր, կողմնակալության ռազմունակության բաղադրիչը: Ջաքարե Բ-ի կողմից ստեղծված կողմնակալություններն ունեցել են փոխարքայությունների կարգավիճակ իր՝ Ջաքարե Բ-ի (1187-1213), Իվանե Ա-ի (1213-1234), Իվանե Ա-ի որդի Սարգիս-Ավագի (1234-1236) օրոք⁶: 1236-1350-ական թվականներին, մոնղոլական տիրապետության ժամանակներում, դրանք հիմնականում շարունակել են ենթակա մնալ թագավոր-սյուզերենի ժառանգներին: 1236 թվականից հետո որոշ կողմնակալ-փոխարքաներ, որոնք առավել ձկուն դիվանագիտություն են իրականացրել մոնղոլ տիրակալների հետ, ձեռք են բերել առավել հեղինակություն, իրենց ներկայացրել են արքա կամ թագավոր: Այդպիսին էին կողմնակալություն-փոխարքայությունների, գրեթե նույն շրջանում գործած գահակալներ Քուրդ Ա Վաչուտյանը, Տարսայիժ Օրբելյանը, Ամիր Հասան Պոռշյանը, Հասան Ջալալ Դոլան և նրանց ժառանգները: Մասամբ նրանց մասին է 1263 թվականին իր «Մեկնութին Դանիելի Վարդանայ Արեւելցոյ» աշխատության հիշատակարանում Վարդան Արեւելցին գրել. «Աղաչեմ զամենեսեան սիրովն... ողորմութիւն և

⁶ Թեև 1213 թվականին մահացած Ջաքարե Բ-ին պիտի հաջորդեր Սարգիս-Շահնշահ որդին, բայց գահը բռնազավթել է հորեղբայրը՝ Իվան Ա-ն, որի մահից հետո գահն անցել է նրա որդի Սարգիս-Ավագին:

թողութիւն մեղաց, և ամենայն երախտաւոր պարոնացն Սաղունին, Սմբատա, Քրդին, Պռաւշայ, և ամենայն բնակչաց երկրիս»: Հիշված անձերը ժամանակի խիստ հայտնի դեմքեր էին: Այստեղ բացակայում է Հասան Զալալ Դոլոյի անունը, որ սպանվել է 1261 թվականին: Նոր է Սաղուն Արծրունու անունը, որ ժամանակակից ու գործակից է եղել Սմբատ Օրբելյանի, Քուրդ Ա Վաչուտյանի, Պռոշ Պռոշյանի հետ:

Կտրականապես համաձայն չենք հայ այն պատմաբանների կարծիքին, որ վերը թվարկված անձանց մասին ասում են՝ ի՞նչ փոխարքա, ի՞նչ արքա, մի փոքր բերդի տերը ի՞նչ արքայությունից պիտի խոսի: Սա պարզ հեզնանք է՝ ուղղված սեփական պատմությանը⁷: Այրարատի, Սյունիքի, Վայոց Ձորի, Արցախի կողմնակալություն-փոխարքայություններից յուրաքանչյուրը և՛ ռազմական, և՛ տնտեսական, և՛ քաղաքական հզորություն ունեին: Այդ իշխանություններից յուրաքանչյուրը բավականաչափ տարածք, և բնակչություն ունեին, տիրապետում էին բերդերի ու ամրոցների, իրենց տարածքներում ունեին հոգևոր-մշակութային բազմաթիվ կառույցներ և, իրերն իրենց անուններով կոչելով, պնդում ենք, որ դրանք իրավաբանորեն փաստացի թագավորություններ էին:

Շահնշահ Զաքարե Բ-ն արևելքի արքայատների նմանությամբ ստեղծել էր պետական արքունիք՝ գործակալներով և պաշտոնատարներով: Արքունիքի բարձրագույն պաշտոնյաներից էին գործակալ-նախարարները⁸, «ամիրան»⁹, «հեջուրը»¹⁰, սպարապետը: Որոշ պաշտոնանուններ եկել էին արաբական և սելջուկյան ժամանակներից, որոշ անուններ

⁷ Պատմաբան Արտաշես Շահնազարյանը Հասան Զալալի դիվանագիտական գործունեության մասին հողվածի անդրադարձում Հասան Զալալի դերը համարել է ֆեոդալիզացում և հեզնել է պատմական արձանագրությունները, որոնցում Հասան Զալալին «արքա» են կոչել% (Շահնազարյան Ա.Ի., 1990, 199–216):

⁸ Բարձրագույն պաշտոններ էին զբաղեցնում իշխանաց իշխաններ Բուբակը և Ամիր Սարգսի որդի Խավոսը (Բաբայան, 1964, 66):

⁹ **Ամիրան** վարչական բնույթի գործառույթ է ունեցել: Նրա գործն էր քաղաքային ներքին կյանքի, առևտրականների և արհեստավորների վերահսկողությունը, հարկադրման հարկահավաքման կարգավորումը, զորահավաքը, քաղաքի պաշտպանության ժամանակ ժողովրդական ուժերի կազմակերպումը (Բաբայան, 1964, 71):

¹⁰ **Հեջուրը** արքունիքի անմիջական վարիչն էր, վերակացուն կամ սենեկապանը: (Բաբայան, 1964, 74):

վրաց արքունիքի անվանացանկից, օրինակ մաախուրթուխցես¹¹, մանդա-
դուրթուխուցես¹²:

Այդ պաշտոնները տրվել են ժամանակի նշանավոր իշխանավոր-
ներին, կողմնակալ-փոխարքաներին:

Խծկոնքի վանքի հյուսիսարևելյան պատին փորագրվել է ոմն
Դավթի արձանագրություն, որի մեջ նա հայտնել է, որ Զաքարե Բ-ի զո-
րավար Գրիգորի (Դադյան, 1913, 182) որդին է: Զաքարե Բ-ի որդի Շահն-
շահ Ա-ի տան զորավարը Ճուճայն էր (Ալիշան, 1881, 128), հեջուրը և ա-
ռաջնորդը՝ Զաքարիա Պահլավունին, ամիրան՝ Վահրամ Պահլավունին:

Իշխանաց իշխան Բուպան կամ Բուպաքը Իվանե Ա-ի տան գործա-
կալ-զորավարն էր (Օրբելյան, 1986, 319), իսկ հեջուրը՝ Խաչենի ազատնե-
րից Գրիգոր Տղան, որին մահանալիս Իվանե Ա-ն հանձնել է «զորդի իւր և
զտուն» (Գանձակեցի, 1961, 222), իսկ Ավագն իր հերթին 1236 թվականին
պաշարված Կայեն բերդից այս Գրիգոր Տղային դեսպան է ուղարկել թա-
թար զորավար Չարմաղանի մոտ՝ հպատակություն հայտնելու (Գանձա-
կեցի, 1961, 256): Իշխանաց իշխան Ամիր-Հասան Պողոյանը Իվանե Ա-ի
ժառանգների արքունիքի սպարապետն էր (Գարեգին արքեպիսկոպոս
Հովսեփյան, 1928, 20):

Կողմնակալություն-փոխարքայությունների արքունիքները բառա-
ցիորեն կազմվել են Զաքարե Բ-ի արքայատան սկզբունքով: Ինչպիսի ար-
քունիք ուներ Զաքարե Բ-ն, նույն սկզբունքով արքունիք էին ձևավորվել
կողմնակալություն-փոխարքայությունները:

Վայոց Ձորի Հերիեր գյուղի իշխան Ամադին Շահումեցին եղել է
Օրբելյանց տան «նիզակակալ և կորովաձիգ ասպարապետ ի դրան **թա-
գաւորաշուք** իշխանաց Բիւրթելին և Վախալսին» (ԺԴ դարի հայերեն ձե-
ռագրերի հիշատակարաններ, 1950, 376):

XIII դարի առաջին քառորդում Վաչուտյանների Այրարատի փո-
խարքայությունում Վաչե Ա Վաչուտյանի հրամանատար կամ հրամանա-
կատար են եղել եղբայրներ Գրիգորը և Գուրգենը (Ղաֆադարյան Կ.,
1948, 88), նրա օրոք ամիրայի պաշտոնում 1221 թվականին հիշվել է ավագ
որդին՝ Քուրդ Ա-ն (Ղաֆադարյան, 1948, 94), հեջուրի պաշտոնում 1300
թվականին հիշվել է Ավեցոյի թոռ, Հոնայի որդի հեջուր Դավիթը (Ղա-

¹¹ Այս պաշտոնը զբաղեցրել է իշխանաց իշխան Խավոսար. «գլուխ իշխեցող, և
հրամանատար ամենայն իշխեցողաց և գլխաւորաց տան թագաւորութեան
տեառն իւրոյ»:

¹² Զաքարե Բ-ի որդի Շահնշահ Ա սպասալարի 1251-1256 թվականների նվիրագրի
տակ ստորագրող վկա է «մանդադուրթուխուցես Համագասպ որդի Սարգսի»:
(Հայ եկեղեցու պատմության սկզբնաղբիւրներ, 2007, 75):

Ֆադարյան Կ., 1948, 83): Եթե հաշվի առնենք, որ բարձրագույն պաշտոններն այդ ժամանակներում հիմնականում ժառանգական են եղել և փոխանցվել են ընտանիքի ներսում, ապա Այրարատում կունենանք հեջուրների իրար հաջորդած երեք սերունդ հանձինս Ավեցոյ տոհմի:

Կողմնակալություն-փոխարքայությունները ղեկավարել են նշանակված կողմնակալները: Զաքարյան Հայաստան-Հայքի անկախության առաջին շրջանում՝ 1200-1213 թվականներին, նրանք գործել են իրենց վերապահված իրավասությունների, շահնշահ-թագավոր-սյուզերենի սահմանած կարգի սահմաններում, ներկայացել են սյուզերենի նկատմամբ ենթակայի ընդգծված ենթակարգությամբ: Մինչդեռ Զաքարե Բ-ի մահից՝ 1213 թվականից հետո, վրացադավանությունն ընդունած, ավելի թույլ Իվանե Ա-ի օրոք արդեն իսկ աստիճանաբար դրսևորել են թագավորական ընտանիքից անթաքույց ինքնիշխանության դրսևորումներ: Մոնղոլական տիրապետության շրջանում թեև նրանք ձևականորեն պահպանել են աստիճանակարգը ընդհուպ մինչև Լենկ-Թեմուրի արշավանքները՝ 1350-ական թվականները, բայց համեմատաբար ազատ են եղել, և նրանցից որոշները մոնղոլների հետ ունեցած կապերի շնորհիվ ստացել են հարկային ինքնուրույնության առանձնաշնորհ ու ձեռք են բերել բարձր ինքնավարություն, որի շնորհիվ՝ բարձրացել է նրանց ինքնուրույնությունը, նրանցից մի քանիսը անվանվել են «արքա», «թագավոր», «ինքնակալ» կամ անգամ «շահնշահ»: Օրբելյան տոհմի հիմնադիր Լիպարիտ իշխանաց իշխանի որդի իշխանաց իշխան Սմբատը, որ գահակալել է 1253-1273 թվականներին, երկու անգամ՝ 1251 և 1256 թվականներին, եղել է Կարա-կորումում և, առաջին այցի ժամանակ, շահագրգռության նպատակով, մոնղոլական մեծ խան Մանգուլին նվիրել թանկարժեք գոհար, որի դիմաց իր տիրույթների համար ստացել է ինջու¹³: 1254 թվականին հայրենիք վերադառնալով՝ տեղի մոնղոլական կառավարիչներից նա ստացել է նոր հողային տիրույթներ, ապա գինական ուժով գրավել Պոռոյաններին, Զաքարյաններին, Վաչուտյաններին պատկանած տարածքներ Վայոց Ձորի, Գեղարքունիքի, Ուրծի գավառներում: Նախ վրաց արքունիքում նա նշանակվել է գահաժառանգի խնամակալ և աթաբեկ (Ստեփանոս Օրբելյան, 1986, 325-335), ապա ավելի ուշ՝ Թավրիզի արքունական պալատի ան-

¹³ **Ինջու** – արքունական, ժառանգական հողատիրույթ մոնղոլական պետությունում և Հուլավյան իլխանությունում /1256-1353 թթ-ին/: Այդ կալվածքներն ազատվել են պետական հարկից, ստացված հարկերը գանձվել են դրանց տիրոջ օգտին: Իշխանավորները, հարկերից ազատվելու նպատակով, իրենց տիրույթներով հաճախ մտել են մոնղոլական իլխանության ինջուի մեջ /Հայկական համառոտ հանրագիտարան, 1995, 361):

դամ, և Թավրիզում 1273-ին կնքել մահկանացուն (Ստեփանոս Օրբելյան, 1986, 335): Հենց այսպիսի ծանաչվածության համար ժամանակակիցները Սմբատ Օրբելյանին վերագրել են արքայական պատիվ՝ անվանել արքա: Նորավանքի գավթի 1261 թվականի շինարարական արձանագրության մեջ արձանագրված է. «Ի թուխ 2Ժ /1261/ այս գիր յիշատակի եւ արձան անջնջելի իմ՝ Սմբատա, իշխանաց իշխանի, որդո մեծին Լիպարտա, որ զգալիթս շինեցի» (Դիվան հայ վիմագրության, 1967, 218): Նույն տեղում մեկ այլ նվիրատվական արձանագրության մեջ Սմբատի անունից վիմագրվել է. «Ես՝ Սմպատ, իշխանաց իշխան...» (Դիվան հայ վիմագրության, 1967, 218): Իսկ առաջին արձանագրության տակ՝ մեկ այլ արձանագրության մեջ, արդեն շեշտված է նրա հզորությունը. «Ի տէրութեան իշխանաց իշխանին Սմպատա» (Դիվան հայ վիմագրության, 1967, 219): Սմբատ իշխանաց իշխանին փոխարքայության գահին փոխարինել է եղբայրը՝ Տարսայիձը: Նա Նորավանքում, եղբոր գերեզմանին, դամբարան-մատուռ է կառուցել և արևմտյան մուտքին վիմագրել. «Ես՝ Տարսաիձ իշխանաց իշխան, շինեցի զդամբարանս յաղագս եղբար իմո **Սմպատ արքան**... ի թվին 2ԻԴ /1275/» (Դիվան հայ վիմագրության, 1967, 234): Դամբարանում գտնվող Սմբատի տապանաքարին փորագրվել է. «**Սմպատ արքան** է տապանս: 2ԻԲ /1273/»: Նույն դամբարանում է թաղվել Տարսայիձ իշխանաց իշխանի կինը: Նրա տապանաքարին փորագրվել է. «Ի թվին 2ԻԷ /1298/: Թագազարմ արքայուհին է՝ Մինա խաթունն, դուստր մեծ **կողմնակալին Աղւանից Ջալալին**» (Դիվան հայ վիմագրության, 1967, 237): Հոր՝ Տարսայիձ իշխանաց իշխանի մասին դուստրը՝ Արցախի Ծար գավառի տեր, Դուփյան տոհմից իշխանաց իշխան Գրիգոր Գ-ի կինը՝ Ասփա իշխանուհին, Խադարի կամ Խադայի վանքի եկեղեցու բեմի ճակատին արձանագրել է. «Ես՝ Ասփե, դուստր **արքայաշուք իշխանին Տարսայիձին, թագազարմ մօրն իմոյ՝ Մինախաթունին**»¹⁴:

Օրբելյան տոհմի հաջորդ սերունդները ևս հիշատակել են իրենց թագավորական ծագումը: XIV դարի կեսերին Իվանե Օրբելյանի դուստր, Վայոց ձորի Հերիեր գյուղի տեր Ամատին Շահունեցի զորավարի կին Թուղթանը, պատերազմում զոհված ամուսնու հիշատակին կառուցել է եկեղեցի, գնել ու եկեղեցուն է նվիրել դարասկզբին գրված մի Ավետարան, որի հիշատակարանում արձանագրել է. «իշխանաց իշխանս Թուղթանի, **դուստր Իւանէ թագաւորատոհմ** եւ բարեպաշտ իշխեցողի Որոտան գաւառի» (ԺԴ դարի հայերեն ձեռագրերի հիշատակարաններ, 1950,

¹⁴ Արձանագրությունն այժմ գոյություն չունի: (Դիվան հայ վիմագրության, 1967, 129)

374), ապա մի քանի տող հետո կրկին նշել. «Եւ իշխանութեան քաջ զաւրավարին Հայոց, աստուածասէր եւ բարեպաշտ իշխանաց իշխանին Բեշքենայ եւ Իւանէ, եւ յետ աստուածասէր երգիւղալից **թագաւորայշնորի պարոն Բիւրդելին եւ Վախախին**, որ ի Քրիստոս փոխեցան» (ԺԴ դարի հայերէն ձեռագրերի հիշատակարաններ, 1950, 375):

Նորավանքի Օրբելյան տոհմի դամբարանում Մինա խաթունի տապանագիրն ապացույց է, որ Ներքին Խաչենի տեր Հասան Զալալը ևս հիշվել է թագավորական տիտղոսով: Սմբատի դամբարանի հյուսիսային պատի արևելյան կամարին փորագրված է Մինա խաթունի արձանագրությունը. «Այս գիր յիշատակի... Մինա խաթունիս է, դստեր **մեծի արքային Զալալին...** Ի թվիս ԶԽԱ (1292)»: Հասան Զալալի ինքնակալ (արքա) լինելը հաստատվում է նաև իր՝ Գանձասարի տաճարի 1240 թվականի մեծ արձանագրության մեջ. «Ես նուստ ծառա Աստուծոյ Զալալ Դաւլայ Հասան, որդի Վախտանգա, թոռն մեծին Հասանա, **բնակաւոր ինքնակալ բարձր եւ մեծ** Արցախական աշխարհի, **ինքնակալ** Խ/ախսանա/բերդի յոքնասահման նահանգաւք» (Դիվան հայ վիմագրության, 1982, 38): Տաճարի արևմտյան պատին, Հասան Զալալի դուստր Մամախաթունն արձանագրել է. «Ես... Մամախաթունս, դուստր **ինքնակալ** իշխանաց իշխանին Զալալ Դաւլա Հասանա...» (Դիվան հայ վիմագրության, 1982, 38): Արցախի Մարտակերտի շրջանի Քոլատակ գյուղի մոտ գտնվող Մեծիրանից Սուրբ Հակոբ վանքի սրահի հարավային պատին ոմն Սմբատ արձանագրել է. «**Թագ/աւ/որ Զալալայ Դավլին** հրամանով... տվի էգատեղ» (Դիվան հայ վիմագրության, 1982, 15): Այգու տարածքի նվիրատվությունը, բովանդակությունից ելնելով, կատարվել է Հասան Զալալի կենդանության օրոք: Բերդաձորի Սուրբ Գրիգոր կամ Կարմիր վանք եկեղեցու հյուսիսային պատին Սակրի որդի Գրիգորիսը արձանագրել է. «Յիշխանութեան բարեպաշտ **արքային Զալալ Դաւլին** եւ որդո իւրոյ Իւանոյ Աթաբակին, ես Գիրիորիս... վերստին շինեցի զեկեղեցիս ի թուիս ԶԼ /1281/» (Դիվան հայ վիմագրության, 1982, 116): Նույն եկեղեցու հյուսիսային պատին Խաչիկ վարդապետը տեսել է հետևյալ արձանագրությունը, որը ցավոք նշված տեղում ներկայում չկա: Բերում ենք հեղինակի տպագրած տեքստից. «ՈՀԸ /1229/ թվ. Ես Տիրածայրս Ապարանից, **բարեպաշտ արքային Զալալին**» (Դիվան հայ վիմագրության, պրակ 1982, 120):

Վաչուտյան Քուրդ Ա իշխանաց իշխանը կենդանության օրոք ժամանակակիցների կողմից պատվվել է «մեծ» կոչումով (Հայերեն ձեռագրերի հիշատակարաններ, 1984, 211բ-212ա): Դրանով է բացատրվում, որ 1254-1255 թվականներին մոնղոլական արքայակայան Կարակորում մեկ-

նող Կիլիկիայի Հեթում Ա թագավորը մեկնելիս և վերադարձին հյուրընկալվել է նրա՝ Վարդենիսի դոյակում: Կիլիկյան մի հիշատակարանում Քուրդ Ա-ն մեծարվել է «**շահնշահ**» տիտղոսով (Բաբայան Լ.Հ., 1964, 64):

Այրարատի կողմնակալ, իշխանաց իշխան Քուրդ Բ Վաչուտյանը ամրապնդել է իր դիրքերը և ձեռք բերելով քաղաքական կշիռ՝ դարձել իր ժամանակի ամենից աչքի ընկնող դեմքերից մեկը: Ասվածի ապացույցն է 1316-1335 թվականների միջև գրված ձեռագրի հիշատակարանը. «Յայսմ ժամանակի երեւեալ քաջ և արի, յաղթող և բարձրաբազուկ իշխանաց իշխանն՝ յազգէ Վաչէի, որդի Տայիրին, որդոյ բարեպաշտ և աստուածասէր Քրդին, որ և անուն նորա **Քուրդ** կոչի, **որոյ անուամբն և քաջութեամբն մնաց գաւառս մեր և վանորայքս անշարժ և անվնաս յայսմ մեղսաշարժ և դառն ցասմանցս**. զի յայսմ նուագեալ և դառնացեալ աւուրս, որ վասն մեղաց մերոց, երեւեալ մեծափառ և աստուածահաճոյ մեծ զօրավարն և երեւելի նախամարտիկ, պարծանաց և զարդու գաւակն Հայաստանից, ամենաօրինեալ **Քուրդն, զի ոտնաձայնք երիվարացն նորա, և ճոճինն նիզակացն, և փայլատակումն սուսերացն, ճայթմունք աղեղացն և կուռ զրահքն և ասպարափակ լինելն, և այլ ահարկու կազմուածն՝ զարհուրեցուցանէին զթշնամիսն, թող զյաղթութիւն և զքաջութիւն, և բազում պատերազմաց վանումն ի ձեռն նորա, և ազատագօրաց նորա բազմութիւն, գեղեցկութեամբ՝ իբրեւ զօր երկնից, և քաջութեամբ՝ իբրեւ զառիւծ կամ իբրեւ քաջարծուի ի վերայ Հայաստանեաց, յամենայն պատերազմունս: Այնու՝ առաջի այլասեռ թագաւորացն՝ Ղազանին և Ղարապանդին և Պուսայիդի և մեծամեծ և սպարապետ նոյինացն մեծարգոյ և փառաւոր երեւեալ, և յամենայն շուք և պատիւ և խիւլայ ընդունեալ, պահէր խնամօքն և ողորմութեամբ աստուծոյ զգաւառս և զվաներս ի խաղաղութեան, և այլոց գաւառակցացն բազում կարեկից և օգնական լինէր: Որոյ՝ աջն անեղին և բազուկն հզօրին աստուծոյ հովանի և պահապան լիցի նմա ի տուէ և ի գիշերի, աստուածասէր և բարեսէր ամուսնաւն Խոյան խաթունին և ամենայն հեծելազօրացն: Քաղցրացի նմա աչք բռնաւորաց և մեծամեծաց, և թշնամիք նորա առաջի յամօթ և նկուն լիցին, և իբրեւ զԿոխ և զԴադան յանդունդս իջցեն. և ձեռք նորա հանապազ ի վերայ թիկանց թշնամեաց իւրոց, ամէն» (ԺԴ դարի հայերեն ձեռագրերի հիշատակարաններ, 1950, 270-271): Թշնամիների դեմ տարած հաղթանակները Քուրդ Բ-ն հավերժացրել է Կարբիի հաղթականար-զանգակատան կառուցումով, որի շինարարությունն ամենայն հավանականությամբ ավարտվել է 1338 թվականին: Նման հաղթականարի կառուցումը եզակի երևույթ է հայկական իրականության մեջ:**

Քուրդ Բ-ն հավասարապես ճանաչման է արժանացել Ղազան, Ղարպանդ, Պուսայիդ խաների օրոք (1295–1335 թվականներին), ինչպես նրանցից, այնպես էլ նրանց մեծամեծերից ու գորավարներից ստացել է **պատիվ ու խիլայ** (յառլիկ–Տ.Պ.):

Քուրդ Բ-ի բնութագրական գնահատականները գրեթե նույնական են XIV դարի մեկ ուրիշ խոշոր քաղաքական դեմքի՝ Գրիգոր Խաչենցուն (–Ծարեցի, Հաթերքցի) նվիրված նկարագրությանը. «Յայսմ ժամանակի ծագեցաւ ոմն, մեծ և երևելի տոհմային պայազատութեան, ի ցեղէ վեհից, ի զարմէ դիցազանց, ի դասակարգէ քաջաց, **ի գնդէ** գովելեաց, Գրիգոր իշխան Հայոց...» (ԺԴ դարի հայերեն ձեռագրերի հիշատակարաններ, 1950, 84):

Մարտունու տարածաշրջանի Վարդենիկ գյուղի մոտ գտնվող Իշխանավանքի գերեզմանատան տարածքում կանգնեցված խաչքարի վրա պահպանված 1290 թվականի արձանագրությունը վերաբերում է Պռոշյան գերդաստանի անվանի իշխանավորներից Ամիր Հասանին: Վիմագրի համաձայն. «Ի թվ/ին/ ՉԼԹ, կամաւն Աստուծոյ, կանկնեցաւ սր. Խաչս իշխանութեան բարեպաշտ **արքային Ամիր Հասանայ...**» (Դիվանն հայ վիմագրության, 1973, 150):

1292 թվականին Խոտակերաց Սուրբ Նշան եկեղեցում արտագրած «Ավետարան»-ի հիշատակարանում գրիչ Շմավոնը Պռոշ իշխանաց իշխանին այսպես է բնութագրել. «Այլ և ներող զօրութիւնն Աստուծոյ պահեաց սակաւ իշխանս յազգէս մերմէ, արիք և քաջք ի պատերազմունս և նոքաւք նուաջէր զազգս Հայոց: Յորքց մի էր ի նոցանէ մեծ սպարապետն տանն Աւագին, որդւոյ Իւանէ մեծ աթաբակին, որ կոչէր անուն նորա Ամիր Հասան, որդի մեծին **Պռոշա թագաշուք իշխանին**» (Հայերեն ձեռագրերի հիշատակարաններ, 1984, 682):

Ամիր Հասանի հռչակն այնպիսին էր, որ երբ 1292 թվականին նա կնքել է մահկանացուն, հիշատակարանագիրը արձանագրել է. «զի իշխանաց իշխանս մեր Ամիր Հասան մահուամբ փոխեցաւ ի Քրիստոս, և ամենայն աշխարհի ի սուգ և ի տրտմութիւն անկան՝ Հայք և Վիրք, Ափղազք և Հոռոմք, զի թէպէտ որ իշխանաց իշխան կոչիւր, սակայն ի **թագաւորաց անբաժանելի էր**, որ յամենեցուն լսելիս հասեալ էր բարի լուր և համբաւ նորայ, որ հեռաւորքն որպէս ի մաւտոյ կոծ և աշխարումն կատարեցին» (Հայերեն ձեռագրերի հիշատակարաններ, 1984, 676):

Կողմնակալությունը՝ վարչական միավոր: Կողմնակալությունների գործառնություններին որոշակի բացատրություն է տվել պատմաբան Լևոն Բաբայանը՝ Վիրքի օրինակով: Նա գրել է. «Վրաստանի ... կենտրոն-

նական իշխանությունն իրագործվում էր «Սվազիթոյի» միջոցով (թագավորի և վեզիրների խորհուրդ): Այդ խորհուրդը բաղկացած էր թագավորից, վեզ վեզիրներից և երկու օգնականից: ... Գավառներն ու շրջանները կառավարում էին էրիսթավները՝ կողմնակալները-զինվորական հրամանատարները, որոնք իրենց վստահված կամ սեփականատիրական իրավունքով իրենց պատկանող շրջաններում, գավառներում, ֆեոդալական տիրույթներում հանդիսանում էին փոխարքաներ և այդտեղ լիակատար տեր ու տնօրեն էին» (Բաբայան Լ. Հ., 1964, 64):

Կողմնակալություն-փոխարքայությունների վերաբերյալ այս բանաձևումը կառավարման նոր մոդել չէր և խորթ չէր նաև հայկական իրականությանը: Այն գրեթե կրկնում էր մեկուկես հազարամյակ առաջ հայոց պետությունում գործած բդեշխություն-կուսակալություն-կողմնակալություն-փոխարքայություն կառավարման համակարգը:

Թեև 1185 թվականին Սարգիս Մեծ Զաքարյանը Վրաստանից անկախություն էր ստացել իրեն ենթակա Լոռու տարածքի նկատմամբ, բայց Վիրքը դեռևս նրան չէր վերադարձրել Վիրքի հարավում ռազմակալված հայկական տարածքները: Եվ հենց այդ բռնակալված հայկական տարածքներում՝ Վրաստանի հարավում՝ արևմտյան ու արևելյան կողմերում, 1191 թվականին հիմնվել են հայկական առաջին անկախ վարչական միավոր-կողմնակալությունները: Դրանք էին.

ա) 1191 թվականին Թամար թագուհու դեմ Գեորգի Ռուսի (առաջին ամուսնու) ապստամբության ձնշմանը մասնակցելու համար Թամար թագուհու հրամանով ժառանգական իրավունքով Թմոզվի=Թմբկաբերդ ամրոցը ստացել է Հայոց թագավոր, Հայոց և վրաց ամիրսպասալար Սարգիս Մեծ Զաքարյանի եղբոր՝ Վահրամի որդի Սարգիս Ա-ն և այդ երկրամասի մի հատվածում ձևավորվել է կուսակալություն-կողմնակալություն: Այս Սարգիս Ա-ի սերունդը պատմության մեջ մտել է Թմոզվեցի տոհմանունով (Հայկական սովետական հանրագիտարան, 1984, 216):

բ) Թամար թագուհին Վահրամի մյուս որդուն՝ Բլուզ Զաքարեին, իր զինուժով Գագ, Քավարզին, Երզնանք, Տավուշ, Կածարեթ, Տերունական, Սագամ, Գարդման, Քարիերձ բերդերի և Շամքորի ազատագրմանը մասնակցելու համար 1191 թվականին ժառանգական իրավունքով տվել է Գագի բերդն ու տարածքների կուսակալ-կողմնակալի պաշտոնը: Պատմության մեջ Բլուզ Զաքարեի սերունդը մտել է Վահրամյաններ անունով (Շահնագարյան Ա. Ի., 1990, 216):

Արդեն կողմնակալության վերածված այս տարածքները Հայաստան-Հայքին են վերադարձվել Սարգիս Մեծին գահի վրա հաջորդած ա-

վագ որդու՝ շահնշահ Ջաքարե Բ Ջաքարյանի պահանջից հետո և դարձել են անկախացած պետության առաջին կողմնակալությունները:

1187 թվականից հետո, հոր գործը շարունակած Ջաքարե Բ-ն, շարունակել է իր նորանկախ պետության տարածքի մեծացումն ու ամրապնդումը: Նա Թմոզվիի ու Գագի կողմնակալություն-փոխարքայությունները համարելով հայկական տարածքներ և պետության հիմք, միացրել է Լոռու թագավորությանը: Ավարտին է հասցրել պետություն ստեղծելու նախապատրաստական հիմնավորումները և կառավարման միասնականացման նպատակով իրականացրել վարչական ռեֆորմ և պետության հիմքում դրել Թմոզվիի և Գագի կողմնակալություն-փոխարքայությունների իշխանական տարբերակը: Այդ նույն տարբերակով 1203 թվականին ազատագրված Դվին քաղաքում ստեղծել է միայն Դվին քաղաքն ընդգրկող կողմնակալություն: Այն, որպես երկրի նախկին մայրաքաղաքը, այդ պահին ավելի քան 150.000 բնակիչ ունեցող քաղաքը, հանձնել է գահակից եղբորը՝ Իվանե Ա-ին: Կառավարման ռեֆորմը ավարտական փուլին է հասել հավանաբար 1203 թվականի ընթացքում: Ջաքարե Բ-ի հրամանով Թմոզվիի, Գագի, Դվինի արդեն ձևավորված կողմնակալություն-փոխարքայությունների, հնից հայտնի Մածնաբերդի, Ներքին ու Վերին Խաչենների թագավորությունների, որ նույնպես վերածվել են կաղմնակալություն-փոխարքայությունների կողքին, Այրարատ նահանգի տարածքի մի զգալի հատվածի վրա հիմնել է Այրարատի կողմնակալություն-փոխարքայությունը, երկու ավելի փոքր կողմնակալություն-փոխարքայություններ ստեղծվել են նոր նվաճված Վայոց Ձորում և մասնակիորեն՝ Սյունիքում¹⁵:

Մածնաբերդի կողմնակալ է նշանակվել թագավոր Աղսարթոնը, Հաթերքի կողմնակալ՝ Վաղթանգ Սակո թագավորը, Ներքին Խաչենի կողմնակալը՝ Ջաքարե Բ-ի քույր Խորիշահի ամուսին Վաղթանգ Տանգիկը, Խաչենի Ծարա ձյուղի կողմնակալ՝ Ջաքարե Բ-ի քույր Դոփը, որի ամուսինը՝ գահերեց իշխան Հասան Ա-ն, մահացել էր¹⁶: Դոփի անունով տոհմը կկոչվել է Դոփյան (Կարապետ եպիսկոպոս, 1914, 44): 1203/4 թվականին նորաստեղծ կողմնակալություն-փոխարքայությունների կողմնակալ-փոխարքա Այրարատում նշանակվել է Վաչե Ա Վաչուտյանը (Պետրոսյանց Տ., 2001, 363; Պետրոսյանց Տ., 2023, 556; Պետրոսյանց Տ., 2018,

¹⁵ Օտարի կողմից զավթված հողերի ազատագրման հաշվին այս կողմնակալության տարածքի մեծացումը շարունակվել է մինչև 1219 թվականը, հայկական հարևան իշխանությունների հողերի հաշվին մեծացվել է նաև 1260-ական թվականներին:

¹⁶ 1214 թվականին Դոփի կողմնակալությանը կմիացվի նաև Հաթերքի կողմնակալությունը:

163; Պետրոսյանց Տ., Զաքարե, 2023, 516), Վայոց Ձորում՝ Վասակ Խաղբակյանը (Գարեգին արքեպիսկոպոս Հովսեփյան, 1928, 304): 1204/5 թվականին Սյունիքի կողմնակալ է հաստատվել Լիպարիտ Օրբելյանը (Գրիգորյան Գ.Մ., 1981, 318), 1205/6 թվականին՝ Կարսի կողմնակալ՝ Իվանե (Հովհան) Ախալցխացին¹⁷:

Կողմնակալության-փոխարքայության կարգավիճակ են ունեցել բոլոր վերը թվարկված վարչական միավորները: Դրա անվերապահ ապացույցը Ներքին Խաչենի ինքնակալ-թագավոր Հասան-Ջալալի Գանձասարի վանքի արևմտյան պատի հարավային մասում, ներկայումս գավթի մեջ փորագրված 1261 թվականի արձանագրությունն է. «...ես՝ Զալալ Դաւլաս, որդի Վախտանգա, **կողմնակալ** Արցախայ...» (Ուլուքաբյան Բ., 1975, 454): Նույն տեղում Հասան Զալալ Դոլոյին վերաբերող մեկ այլ արձանագրությամբ նրա դուստր հայտնել է. «...ես... Մամախաթունս, դուստր **ինքնակալ իշխանաց իշխանին** Զալալ Դաւլա Հասանա...» (Դիվան հայ վիճագրության, 1982, 41):

Համաձայն չենք այն մոտեցման հետ, թե Հասան-Ջալալն ավելի բարձր ինքնուրույնության մակարդակ է ունեցել, քան մյուս կողմնակալություն-փոխարքայությունները: Փաստենք, որ ինչպես նա, այնպես էլ հին տոհմերից Մաժնաբերդի Աղսարթոնը, Հաթերքի Վախթանգը նույնպես սերել են թագավորական տոհմերից: Այստեղ միայն մեկ տարբերություն կարող ենք արձանագրել: Սարգիս Թմոզվեցին, Զաքարե Գագեցին շահնշահ Զաքարե Բ-ի հորեղբորորդիներ էին, Իվանե Ա-ն՝ եղբայրը, Հասան Զալալը՝ նրա քրոջ որդին: Աղսարթոնի, Վաչե Ա Վաչուտյանի, Լիպարիտ Օրբելյանի, Վասակ Պոռոջյանի, Իվանե Ախալցխեցու նկատմամբ սրանց որոշակի առավելությունը միայն արքայատան հետ անձնական-բարեկամական կապն է եղել:

Փաստորեն Զաքարյան Հայաստան-Հայքի կազմում գործել են Գագի, Թմոզվի, Մաժնաբերդի, Դվինի, Այրարատի, Վայոց Ձորի, Սյունիքի, Հաթերքի, Ծարի, Ներքին Խաչենի, Կարսի կողմնակալություն-փոխարքայությունները:

Համաձայն չենք նաև հայ պատմագրության մեջ կարծրացած այն տեսակետին, որի համաձայն՝ ազատագրված Հայաստան-Հայքը բաժանվել է Զաքարե Բ-ի, Իվանե Ա-ի ու Վահրամյանների միջև: Սրա պատճառն այն է, որ հայ պատմագրությունը չի ընդունել Զաքարե Բ-ի վերակերտած

¹⁷ Կարսի ազատագրումից հետո Թամար թագուհին փորձ է արել այն կցել Վիրքի տարածքին: Զաքարե Բ-ի պահանջով մի քանի ամիս անց այն վերադարձվեց Հայաստանին:

Հայաստան–Հայքի պետականությունը: Այսինքն՝ պետությունը մասնատելով՝ այդ կտորներից ձևավորել են պետություն չդարձած իշխանապետություն: Իհարկե, այդպես չէ: Զաքարե Բ-ն հիմնադրել է ամբողջովին անկախ պետականություն իր՝ շահնշահի գլխավորությամբ, իսկ մնացյալ բոլոր կառույցները եղել են ենթակա կողմնակալություններ:

Պետության առաջին ինքնակալ–շահնշահ Զաքարե Բ-ն, նրա գահակից եղբայր Իվանե Ա-ն նորաստեղծ կողմնակալություն–փոխարքայությունների համար ապահովել են համապատասխան իրավական կարգավիճակ.

ա) կողմնակալություն–փոխարքայություններին տրվել է կառավարման հստակ տարածք,

բ) կոմսակալ–փոխարքաներին կողմնակալության–փոխարքայության տարածքում, կերակրվելու համար, տրվել է ժառանգական հայրենիք–կալվածք (օրինակ, Այրարատի կողմնակալություն–փոխարքայությունում, կառավարման տարածքից անկախ, Վաչուտյաններին ժառանգական սեփականության իրավունքով տրվել են Նիգ–Արագածոտն գավառները, Անբերդի գավառամասը, Շիրակից՝ գավառամաս),

գ) կողմնակալ–փոխարքաներին շնորհվել է պետական աստիճանակարգի թագավորից հետո երկրորդ՝ իշխանաց իշխան բարձրագույն կոչում¹⁸,

դ) կողմնակալ–փոխարքաներին տրվել է կողմնակալության–փոխարքայության տարածքում ինքնուրույն իշխելու իրավունք:

Զաքարյանների կողմից Հայաստանում հիմնված կողմնակալություն–փոխարքայությունները լուծել են պետության ներսում թե ուղղահայաց, թե հորիզոնական կառավարման խնդիրը և 1200–1236 թվականներին դարձել են պետական, ռազմական, մշակութային կարևորագույն գործիք Զաքարյան տիրակալների համար:

Եզրակացություններ

Կողմնակալություն, կողմնակալ եզրույթները թեև հնագույն ծագում ունեն, հայկական քաղաքական, ռազմական, վարչական մտածողության, հիշատակագրության մեջ շրջանառվել են նվազագույնը մ.թ.ա. V դարից, ունեցել են ստույգ կիրառական նշանակություն: Համոզված ենք, որ

¹⁸ Այստեղ հիշվել է ինչպես Հասանի «ինքնակալ» («թագավոր»), տոհմական տիտղոսը, այնպես էլ Զաքարե Բ-ի շնորհած իշխանաց իշխան կոչումը: Դրանից բարձր էին միայն «շահնշահ», «կեսար» կոչումները, որոնք վերապահված էին միայն Զաքարե Բ-ին: (Դիվան հայ վիճագրության, 1982, 41)

պատմահայր Մովսես Խորենացին շրջանառության մեջ դնելով կողմնակալություն, կողմնակալ, կուսակալ, բղեշխ, նախարար եզրույթները, կատարելապես գիտեր դրանցից յուրաքանչյուրի նշանակությունը: Գիտեր, որ կողմնակալությունը, կուսակալությունը, բղեշխությունը վարչատարածքային միավոր են, բղեշխը, նախարարը՝ աստիճան-կոչում, կողմնակալը, կուսակալը՝ պաշտոն:

XIII դարի սկզբին Հայաստան-Հայքի շահնշահ Զաքարե Բ Զաքարյանի կողմից վերաշրջանառության մեջ դրված **կողմնակալություն** եզրույթը, ինչպես հնում, վարչատարածքային միավոր էր, իսկ **կողմնակալ** եզրույթը՝ պաշտոն: Կողմնակալ նշանակված պաշտոնատարներին համապատասխանաբար շնորհվել է **իշխանաց իշխան** բարձրագույն աստիճան-կոչում: 1203 թվականին ստեղծված կողմնակալություն-փոխարքայությունները կարևորագույն դեր են ունեցել Զաքարյանների ստեղծած անկախ պետության համակարգում և, մինչև մոնղոլների կողմից Հայաստանի գրավումը, երեք տասնամյակ ապահովել են հայ ժողովրդի սոցիալ-տնտեսական, մշակութային զարգացումը:

Տիգրան Մ. Պետրոսյանց – հեղինակ է 66 գրքի և հարյուրից ավելի գիտական հոդվածների: Գիտական հետաքրքրությունների շրջանակում են XII-XIV դարերի Հայոց պատմությունը, Հայոց պետության պաշտպանական հնարավորությունների, հայ իշխանական տների, նրանց զինանշանների պատմության հետ կապված խնդիրները:

Հրաչյա Տ. Պետրոսյանց – համահեղինակ է երկու գրքի, վեց գիտական հոդվածների: Գիտական հետաքրքրությունների շրջանակում Հայոց բանակի պաշտպանական հնարավորություններին առնչվող խնդիրներն են:

Գրականության ցանկ

1. **Ալիշան Հ. Ղ.**, (1881). *Շիրակ*, Վենետիկ, 192:
2. **Աղայան Է. Բ.**, (1976). *Արդի հայերենի բացարձակական բառարան*: Ա-Զ: Եր., «Հայաստան» հրատարակչություն, 929:
3. **Աճառյան Հր.**, (1973). *Հայերեն արմատական բառարան*: Բ հատոր, Ե-Կ: Եր., Երևանի պետական լսարանի հրատարակչություն, 688:
4. **Բաբայան Լ. Հ.**, (1964). *Հայաստանի սոցիալ-տնտեսական պատմությունը XIII-XIV դարերում*, Եր., Հահպետհրատ, 601:

5. **Բլբուլյան Ա.**, (2011). *Նոր ռուս-հայերեն բառարան*, Եր., հեղինակային հրատարակչություն, 1070:
6. **Գարեգին արքեպիսկոպոս Հովսեփյան**. (1928). *Խաղբակյանք կամ Պողոսյանք հայոց պատմության մեջ*: Պատմա հնագիտական ուսումնասիրություններ, Վաղարշապատ, 304:
7. **Գրիգոր Ակներցի**. (1954). *Պատմություն ազգին ներողաց*, Հարվարդ, Քեմբրիջ, 179:
8. **Գրիգոր Ակներցի**. (1974). *Պատմության թաթարաց*, Երուսաղեմ, 80:
9. **Գրիգորյան Գ.Մ.**, (1981). *Սյունիքը Օրբելյանների օրոք*: Եր., ՀՍՍՀ ԳԱ հրատ., 318:
10. *Դիվանի հայ վիմագրության*. (1967). պրակ III, Վայոց Ձոր, կազմեց Ս.Գ.Բարխուդարյան, Եր., ՀՍՍՌ ԳԱ հրատարակչություն, 428:
11. *Դիվանի հայ վիմագրության*. (1973). պրակ IV, Գեղարքունիք, կազմեց Ս.Գ.Բարխուդարյան, Եր., ՀՍՍՌ ԳԱ հրատարակչություն, 527:
12. *Դիվանի հայ վիմագրության*. (1982). Պրակ V: Արցախ: Կազմեց Ս.Գ.Բարխուդարյանը: Եր., ՀՍՍՀ ԳԱ հրատարակչություն, 348:
13. *Դիվանի հայ վիմագրության*. (1977). պրակ VI, կազմեց Ս.Գ.Բարխուդարյան, Եր., ՀՍՍՀ ԳԱ հրատարակչություն, 332:
14. **Թորոսյան Խ.**, (1992). *«Թագակիրների պատմությունն ու գովաբանությունը» որպես Զաքարյան Հայաստանի պատմության սկզբնաղբյուր*, Եր., ՀԳԱ հրատարակչություն, 611:
15. *ԺԴ դարի հայերեն ձեռագրերի հիշատակարաններ*. (1950). կազմեց **Լ.Ս.Խաչիկյան**, Եր., ՀՍՍՌ ԳԱ, հրատարակչություն, 758:
16. **Խաչիկ վարդապետ Դադյան**. (1913). *Նորագալիս մագաղաթեայ նօյրագիր ցուցակ Սաղմոսավանից մարենադարանի*: «Շողակաթ», Ս. Էջմիածնի հայագիտական ժողովածու, Վաղարշապատ, Ս. Էջմիածին, 219:
17. **Կարապետ եպիսկոպոս**. (1914). *Նյութեր հայ մեղիքության մասին*: Բ պրակ, Դովեանք եւ Մելիք Շահնազարեանք: Ս. Էջմիածին, տպարան Մայր Աթոռոյ, 233:
18. **Կիրակոս Գանձակեցի**. (1961). *Պատմություն Հայոց*: Աշխատասիրությամբ Կ.Մելիք-Օհանջանյանի, Եր., ՀԽՍՌ ԳԱ հրատարակչություն, 428:
19. *Հայ եկեղեցու պատմության սկզբնաղբյուրներ*. (2007). Ա, Յիշատակարան Սանահնոյ վանից (Սանահնի Քէօթուկը): Ս. Էջմիածին, 336:
20. *Հայ ժողովրդի պատմություն*. (1976). հտ. 3, Եր., ՀՍՍՀ ԳԱ, 1032:
21. *Հայերեն ձեռագրերի հիշատակարաններ*. (1984). ԺԳ դար, կազմեց **Ա.Ս.Մաթևոսյան**, Եր., ՀՍՍՀ ԳԱ, 988:
22. *Հայերեն բացարական բառարան*. (1944). Կազմեց **Ստ.Մալխասեանց**: Հատոր 2, Զ-Կ: Եր., Հայկական ՍՍՌ պետական հրատարակչություն, 512:
23. *Հայկական սովետական հանրագիտարան*. (1977). հտ. 3, Եր., 720:
24. *Հայկական սովետական հանրագիտարան*. (1984). հտ. 10, Եր., 736:
25. *Ժամանակակից Հայոց լեզվի բացարական բառարան*. (1974). հտ. 2-րդ Կ-Մ: Կազմեցին՝ Ա.Մ.Սուքիասյան, Ե.Գ.Տեր-Մինասյան, Ա.Ս.Հակոաթյան, Հ.Հ. Կոստանյան: Գլխ.խմբագիր՝ Գ.Բ.Ջահուկյան, Եր., ՀՍՍՀ ԳԱ հրատարակչություն, 574:

26. **Ղազար Փարպեցի.** (1882). *Հայոց պատմություն: Թուրք Վահան Մամիկոնյանին: Աշխարհաբար թարգմանությունը և ծանոթագրությունները* Բագրատ Ուլուքաբյանի, Եր., Երևանի համալսարանի հրատարակչություն, 540:
27. **Ղաֆադարյան Կ.,** (1948). *Հովհաննավանքը և նրա արձանագրությունները*, Եր., ԳԱ հրատարակչություն 124:
28. **Մովսէսի Խորենացու.** (1881). *Պատմություն Հայոց:* Տփլիս, տպարան Յովհաննու Մարտիրոսեանց, 417:
29. **Մակար եպս. Բարխուտարեանց.** (1999). *Աղուանից երկիր և դրացիք:* Արցախ, Ե., Գանձասար, 415:
30. **Մանանդյան Հ.,** (1977). *Երկեր*, հտ. Գ, ՀՍՍՀ ԳԱ Պատմության ինստիտուտ, Եր., 503:
31. **Յովհաննէս Եպիսկոպոս Շահխաթունեանց.** (1842). *Սյորազրություն Կաթողիկէ Էջմիածնի և հինգ գաւառացն* Արարատայ: Մայր Աթոռ Սուրբ Էջմիածին, 293:
32. «Նոր բառգիրք Հայկազեան լեզուի» (1836). Երկասիրություն երից վարդապետաց Հ. Գաբրիէլի Աւետիքեան, Հ. Խաչատրոյ Սիւրմէլեան, Հ. Մկրտչի Աւգերեան: Հատոր առաջին, Ա-Կ: Ի Վենետիկ, Ի տպարանի Սրբոյն Ղազարու, յամին, 1140:
33. **Շահնագարյան Ա.Ի.,** (1990). *Վահրամյանների իշխանությունը*, Եր., Հայաստան, 216:
34. **Պետրոսյանց Տ.,** (2018). *Գիւղն որ կոչի Վարդենիս ի Նիգ գաւառի:* Վեպ: Եր., Հեղինակային հրատարակչություն, 168:
35. **Պետրոսյանց Տ.,** (2023). *Զաքարե*, վեպ, Եր., Հեղինակային հրատարակչություն, 515:
36. **Պետրոսյանց Տ.,** (2023). *Վաչուրյաններ:* Մենագրություն, հոդվածներ, Եր., Հեղինակային հրատարակչություն, 558:
37. **Սուքիասյան Ա. Մ.,** (2003). *Հայոց լեզվի հոմանիշների բառարան*, Եր., Երևանի համալսարանի հրատարակչություն, 1237:
38. **Ստեփանոս Օրբելյան.** (1986). *Սյունիքի պատմություն, թարգմանությունը*, ներածությունը և ծանոթագրությունները Ա.Ա.Աբրահամյանի, Եր., Սովետ. գրող հրատարակչություն, 616:
39. **Ուլուքաբյան Բ.,** (1975). *Խաչենի իշխանությունը X-XVI դարերում*, Եր., ՀՍՍՀ ԳԱ հրատարակչություն, 454:
40. **Какабадзе С.,** (1926). Грамота груз. царя Георгия III по поводу восстания князей Орбели в 1177г. – Изв.КИАИ, т. IV, 148 с.:

Bibliography (Latin Script)

1. **Alishan H. GH.**, (1881). *Shirak*, Venetik, 192 էջ. **(in Armenian)**
2. **Aghayan Ė.B.**, (1976). *Ardi hayerei bats'atrankan bararan*: A-DH: Yerevan, «Hayastan» hratarakch'ut'yun, 929 էջ. **(in Armenian)**
3. **Acharyan Hr.**, (1973). *Hayeren armatakan bararan*: B hator, E-K: Yerevan, Yerevani pethamalsarani hratarakch'ut'yun, 688 էջ. **(in Armenian)**
4. **Babayan L.H.**, (1964). *Hayastani sots'ial-tntesakan patmut'yuně XIII-XIV darderum*, Yerevan, Haypethrat, 601 էջ. **(in Armenian)**
5. **Blbulyan A.**, (2011). *Nor rus-hayeren bararsn*, Yerevan, Heghinakayin hratarakch'ut'yun, 1070 էջ. **(in Armenian)**
6. **Garegin ark'episkopos Hovsep'yan.** (1928). *Khaghbakyan' kam Proshyan' hayots' patmut'yan mej*: Patmahnagitakan usumnasirut'yunner, Vagharshapat, 304 էջ.
7. **Grigor Aknerts'i.** (1954). *Patmut'yun azgin netoghats'*, Harvard, K'embrij, 174 էջ. **(in Armenian)**
8. **Grigor Aknerts'i.** (1974). *Patmut'iwn t'at'arats'*, Erusaghem, 1974, 80 էջ. **(in Armenian)**
9. **Grigoryan G. M.**, (1981). *Syunik'ě Ėrbelyaneri Ėrok'*, Yerevan, HSSH GA hratarakch'ut'yun, 318 էջ. **(in Armenian)**
10. **Divan hay vimagrut'yan.** (1967). prak III, Vayots' Dzor, kazmets' S.G. Barkhudaryan, Yerevan, HSSR GA hratarakch'ut'yun, 428 էջ. **(in Armenian)**
11. **Divan hay vimagrut'yan.** (1973). prak IV, Geghark'wnik', kazmets' S.G. Barkhudaryan, Yerevan, HSSR GH hratarakch'ut'yun, 527 էջ. **(in Armenian)**
12. **Divan hay vimagrut'yan.** (1982). prak V, Arts'akh: Kazmets' S.G. Barkhudaryaně, Yerevan, HSSH GA hratarakch'ut'yun, 348 էջ. **(in Armenian)**
13. **Divan hay vimagrut'yan.** (1977). prak VI, kazets' S.G. Barkhudaryan, Yerevan, HSSH GA hratarakch'ut'yun, 332 էջ. **(in Armenian)**
14. **T'orosyan Kh.**, (1992). *T'agakirneri patmut'yunn u govabanut'yuně» vorpes Zak'aryan Hayastani patmut'yan skzbnaghbyur*, Yerevan, HGA hratarakch'ut'yun, 611 էջ.
15. *Zhd dari hayeren dzeragreri hishatakaranner.* (1950). kazmets' L.S. Khach'ikyan, Yerevan, HSSR GA hratarakch'ut'yun, 758 էջ. **(in Armenian)**
16. **Khach'ik vardapet Dadyan.** (1913). *Noragawit magaghat 'eay nōtragir ts'uts'ak Saghmosavanits' matenadarani*: «Shoghakat'», S. Ėjmiatsni hayagitakan zhoghovatsu, Vagharshapat, 219 էջ. **(in Armenian)**
17. **Karapet episkopos.** (1914). *Nyut'er hay melik'ut'ean masin*: B prak, Dop'eank' ew Melik' Shahnazareank': S. Ėchmiadzin, tparan Mayr At'oroy, 233 էջ. **(in Armenian)**
18. **Kirakos Gandzakets'i.** (1961). *Patmut'yun Hayots': Ashkhataasirut'yamb K.Mekik'-Ėhanjanyani*, Yerevan, HKhSR GA hratarakch'ut'yun, 428 էջ. **(in Armenian)**
19. *Hay ekeghets'u patmut'yan skzbnaghbiurner.* (2007). A, Yishatakarani Sanahnoy vanits' (Sanahini K'Ėot'ukě): S. Ėchmiadzin, 336 էջ. **(in Armenian)**
20. *Hay zhoghovrdi patmut'yun.* (1976). ht. 3, Yerevan, HSSH GA hratarakch'ut'yun, 1032 էջ.
21. *Hayeren dzeragreri hishatakaranner.* (1984). ZhG dar, kazmets' A.S. Mat'evosyan, Yerevan, HSSH GA hratarakch'ut'yun, 988 էջ. **(in Armenian)**

22. *Hayerēn bats'atrankan bararan.* (1944). Kazmets' St. Malkhaseants': Hator 2, Z-K, Yerevan, Haykakan SSR petakan hratarakch'ut'yun, 512 էջ. **(in Armenian)**
23. *Haykakan sovetakan hanragitaran.* (1977). ht. 3, Yerevan, 720 էջ. **(in Armenian)**
24. *Haykakan sovetakan hanragitaran.* (1984). ht. 10, Yerevan, 736 էջ. **(in Armenian)**
25. *Zhamanakakits' Hayots' lezvi bats'atrankan bararan.* (1974). ht.2-rd K-M: Kazmets'in` A.M. Suk'iasyan, E.G.Ter-Minasyan, A.S.Hakobyan, H.H. Kostanyan: Glkh. khmbagir` G.B. Jahukyan, Yerevan, HSSH GA hratarakch'ut'yun, 1974, 574 էջ. **(in Armenian)**
26. **Ghazar P'arpets'I.** (1982). *Hayots' patmut'yun: T'ught' Vahan Mamikonyanin:* Ashkharhabar t'argmanut'yunē ev tsanot'agrut'yunnerē Bagrat Ulubabyani, Yerevan, Yerevani hamalsarani hratarakch'ut'yun, 540 էջ. **(in Armenian)**
27. **Ghafadaryan K.,** (1948). *Hovannavank'ē ew nra ardzanagrut'yunnerē,* Yerevan, GA hratarakch'ut'yun, 124 էջ. **(in Armenian)**
28. **Movsēs Khorenatswoy.** (1881). *Patmut'yun Hayots':* Tp'khis, tparan Yovhannu Martiroseants', 417 էջ. **(in Armenian)**
29. **Makar eps. Barkhutareants'.** (1999). *Aghuanits' erkir ew drats'ik':* Arts'akh, Yerevan, Gandzasar, 415 էջ. **(in Armenian)**
30. **Manandyan H.,** (1977). *Erker,* ht. G, Yerevan, HSSH GA Patmut'yan institute, 503 էջ. **(in Armenian)**
31. **Yovhannēs episkopos Shahkhat'uneants'.** (1842). *Storagrut'yun Kat'ughikē Ėchmiatsni ew hing gawarants'n* Araratay: Mayr At'or Surb Ėchmiatsin, 293 էջ. **(in Armenian)**
32. «*Nor bargirk' Haykazean lezuwi*». (1836). Erkasirut'iunerits' vardapetats' H.Gabrieli Awetik'ean, H. Khach'atroy Sēiurmēlean, H. Mkrtch'i Awgerean: Hator arajin, A-K: I Venetik, I tparani Srboyn Ghazaru,yamin, 1140 էջ. **(in Armenian)**
33. **Shahnazaryan A.I.,** (1990). *Vahramyanneri ishkhanut'yunē,* Yerevan, Hayastan, 216 էջ. **(in Armenian)**
34. **Petrosyants' T.,** (2018). *Giughn vor koch'i Vardenis i Nig gavari:* Vep: Yerevan, Heghinakayin hratarakch'ut'yun, 168 էջ. **(in Armenian)**
35. **Petrosyants' T.,** (2023). *Zak'are,* vep: Heghinakayin hratarakch'ut'yun, Yerevan, 515 էջ. **(in Armenian)**
36. **Petrosyants' T.,** (2023). *Vach'utyanner:* Menagrut'yun, hodvatsner, Heghinakayin hratarakch'ut'yun, Yerevan, 558 էջ. **(in Armenian)**
37. **Suk'iasyan A.M.,** (2003). *Hayots' lezvi homanishneri bararan,* Yerevani hamalsarani hratarakch'ut'yun, Yerevan, 1237 էջ. **(in Armenian)**
38. **Step'anos Ōrbelyan.** (1986). *Syunik'I patmut'yun,* t'argmanut'yunē, neratsutyunē ev tsanot'agrut'yunnerē A.A. Abrahamyan Yerevan, Sovet grogh, 616 էջ. **(in Armenian)**
39. **Ulubabyan B.,** (1975). *Khach'eni ishkhanut'yunē X-XVI darerum,* Yerevan, HSSH GA hratarakch'ut'yun, 454 էջ. **(in Armenian)**
40. **Kakabadze S.,** (1926). Gramota gruz. *carja Gjeorgija III po povodu vosstanija knjazjej Orbjeli v 1177g.-izv.* KIAI, t. IV, 148 s. **(in Armenian)**